

# **AMATEGEKO SHINGIRO AVUGURUYE Y'IHURIRO RY'ABAGIZE INTEKO ISHINGA AMATEGEKO Y'U RWANDA BAHARANIRA IMIBEREHO MYIZA Y'ABATURAGE N'ITERAMBERE (RPRPD)**

---

## **IRANGASHINGIRO**

Dushingiye ku Itegeko Ngenga N°007/2018.OL ryo ku wa 08/09/2018 rigenga imikorere ya Sena, mu ngingo yaryo ya 142;

Dushingiye ku Itegeko Ngenga N° 002/2024.OL ryo ku wa 12/07/2024 rigena imikorere y'Umutwe w'Abadepite, mu ngingo yaryo ya 211;

Tumaze kubona intambwe u Rwanda rumaze gutera mu guhangana n'ingaruka za Jenoside yakorewe Abatutsi mu 1994, mu kugena ingamba zihamye zo kurwanya ubukene, mu guteza imbere imibereho myiza y'abaturage n'ubukungu;

Tumaze kubona ibyakozwe mu rwego rwo gushyira mu bikorwa gahunda y'ibikorwa y'Inama mpuzamahanga yerekeye abaturage n'iterambere (CIPD) yabereye i Kayiro, muri Nzeri 1994;

Twibukije umwanzuro w'Inteko Rusange y'Inteko Ishinga Amategeko y'u Rwanda y'Inzibacyuho wo ku wa 19 Ugushyingo 2002, wemeje ishingwa ry'Ihuriro ry'Abagize Inteko Ishinga Amategeko y'u Rwanda baharanira Imibereho Myiza y'abaturage n'Iterambere;

Tumaze kubona ko Ihuriro mu mikorere yaryo rigomba kuba isoko y'ibitekerezo bishya, umusemburo w'impinduramatwara no gukora ubukangurambaga, hagamijwe kurushaho kunganira Inteko Ishinga Amategeko mu gushyira mu bikorwa inshingano zayo;

Duteraniye mu nama y'Inteko Rusange yo ku wa 05/12/2024 ;

Twebwe, Abanyamuryango ba RPRPD, twemeje ko Amategeko shingiro ya RPRPD ahinduwe ku buryo bukurikira :

## **UMUTWE WA MBERE: ISHYIRWAHO, IZINA , ICYICARO N'INTEGO BY'IHURIRO**

### **Ingingo ya mbere: Icyo aya mategeko shingiro agamije**

Aya mategeko shingiro akena imiterere n'imikorere by'Ihuriro ry'Abagize Inteko Ishinga Amategeko y'u Rwanda baharanira Imibereho Myiza y'Abaturage n'Iterambere.

### **Ingingo ya 2: Ishyirwaho n'izina by'Ihuriro**

Hashyizweho Ihuriro ry'Abagize Inteko Ishinga Amategeko baharanira Imibereho Myiza y'Abaturage n'Iterambere, ryitwa "RPRPD" mu magambo ahinnye y'Igifaransa.

### **Ingingo ya 3: Icyicaro cya RPRPD**

Icyicaro cya RPRPD kiri mu Ngoro y'Inteko Ishinga Amategeko, mu Muji wa Kigali, Umurwa Mukuru wa Repubulika y'u Rwanda.

#### **Ingingo ya 4: Intego rusange ya RPRPD**

RPRPD iharanira ko ubwiyongere bw'abaturage bujyana n'ubwiyongere bw'ubukungu bw'Igihugu hagamijwe iterambere rirambye.

#### **Ingingo ya 5: Intego zihariye za RPRPD**

RPRPD ibinyujije mu nshingano z'Inteko Ishinga Amategeko ifite intego zihariye zikurikira:

- (a) Gukora ubukangurambaga ku nzego n'abaturage hagamijwe gufata ingamba zo gukemura ibibazo bijyanye n'ubuzima bw'imyorokere, ubuzima bw'umubyeyi n'umwana, ingimbi n'abangavu, indwara zandura n'izitandura, kutihaza mu biribwa n'ingaruka z'imihindagurikire y'ikirere;
- (b) Kugira uruhare mu guteza imbere gahunda y'uburezi kuri bose no guhanga imirimo;
- (c) Kongerera ubushobozi abagize Inteko Ishinga Amategeko hagamijwe kubafasha kuzaza inshingano za RPRPD.

#### **Ingingo ya 6: Igihe RPRPD izamara**

Igihe RPRPD izamara ntikigenwe.

### **UMUTWE WA II: ABANYAMURYANGO BA RPRPD**

#### **Ingingo ya 7: Kuba umunyamuryango wa RPRPD**

- (1) Umunyamuryango wa RPRPD ni Umudepite cyangwa Umusenateri ubisabye mu nyandiko, bikemezwa n'Inteko Rusange yayo .
- (2) Mu ntangiriro ya manda y'Umutwe w'Inteko Ishinga Amategeko, Umudepite cyangwa Umusenateri wifuza kuba umunyamuryango wa RPRPD abisaba mu nyandiko Perezida w'Umutwe w'Inteko Ishinga Amategeko abarizwamo.
- (3) Iyo hashyizweho ubuyobozi bwa RPRPD, uwifuza kuba Umunyamuryango wa RPRPD yandikira Perezida wayo.
- (4) Ugize Inteko Ishinga Amategeko asaba kuba Umunyamuryango wa RPRPD agendeye kuri ibi bikurikira, bifite aho bihuriye n'intego za RPRPD:
  - (a) Ibimushishikaje ;
  - (b) Ubumenyi bwihariye;
  - (c) Inararibonye;

(d) Umwanya.

**Ingingo ya 8: Uburenganzira bw'umunyamuryango**

Umunyamuryango wa RPRPD afite uburenganzira bukurikira:

- (a) Gutora cyangwa gutorwa mu nzego za RPRPD hakurikijwe ibiteganywa n'aya mategeko shingiro;
- (b) kumenya no kumenyeshwa amakuru yose arebana na RPRPD;
- (c) kugira uruhare mu bikorwa byose bya RPRPD;
- (d) Kureka kuba umunyamuryango wa RPRPD.

**Ingingo ya 9: Kureka kuba umunyamuryango**

Ugize RPRPD atakaza kuba Umunyamuryango iyo:

- (a) asezeye kuba umunyamuryango;
- (b) yeguye ku murimo w'ugize Inteko Ishinga Amategeko;
- (c) manda y'abagize Umutwe w'Inteko Ishinga Amategeko abarizwamo irangiye ;
- (d) apfuye

**Ingingo ya 10: Inshingano z'umunyamuryango**

Umunyamuryango wa RPRPD afite inshingano zikurikira:

- (a) kubahiriza amategeko agenga RPRPD;
- (b) gutanga ibitekerezo bifasha RPRPD kuba isoko y'ibitekerezo bishya byifashishwa n'Inteko Ishinga Amategeko mu mikorere yayo;
- (c) gutanga ibitekerezo bituma RPRPD iba umusemburo w'impinduka nziza, hagamijwe gushyira mu bikorwa intego zayo;
- (d) kugira uruhare mu bikorwa bya RPRPD no guharanira icyayiteza imbere;
- (e) kubaha no gushyira mu bikorwa ibyemezo by'ubuyobozi bwa RPRPD.

**UMUTWE W A III: IMITUNGANYIRIZE N'IMIKORERE BY'INZEGO ZA RPRPD**

**Ingingo ya 11: Inzego z'ubuyobozi za RPRPD**

Inzego z'ubuyobozi za RPRPD ni izi zikurikira:

- (a) Inteko Rusange;
- (b) Komite Nshingwabikorwa.

Mu gushyira mu bikorwa inshingano zayo, RPRPD ishobora gushyiraho Komisiyo tekinike ishinzwe gukora igikorwa cyemejwe n'Inteko Rusange, igasoza imirimo yayo itanze raporo ku Nteko Rusange .

### **Iciviro cya mbere: Inteko Rusange**

#### **Ingingo ya 12: Abagize Inteko Rusange**

Inteko Rusange igizwe n'Abanyamuryango bose ba RPRPD.

#### **Ingingo ya 13: Inshingano z'Inteko Rusange**

Inteko Rusange ya RPRPD ni rwo rwego rukuru mu gufata ibyemezo, ifite inshingano zikurikira:

- (a) Kwemeza abanyamuryango;
- (b) Kwemeza no guhindura amategeko shingiro;
- (c) Kwemeza gahunda y'ibikorwa by'umwaka n'ingengo y'imari yabyo;
- (d) Kwemeza raporo y'ibikorwa by'umwaka;
- (e) Gufata umwanzuro kuri raporo ya Komisiyo Tekiniki;
- (f) Gutora no gusimbuza abagize inzego z'ubuyobozi.

#### **Ingingo ya 14: Iterana ry'inama z'Inteko Rusange n'ifatwa ry'ibyemezo**

- (1) Inteko Rusange iterana mu nama isanzwe rimwe mu mwaka. Ishobora kandi guterana mu nama idasanzwe igihe cyose bibaye ngombwa.
- (2) Haseguriwe ibiteganywa mu ngingo ya 7 y'aya mategeko shingiro, inama y'Inteko Rusange itumizwa mu nyandiko kandi ikayoborwa na Perezida wa RPRPD, iyo adahari itumizwa na Visi Perezida, hasigaye nibura iminsi itanu ngo inama iterane.
- (3) Kugira ngo Inteko Rusange ya RPRPD iterane mu buryo bwemewe n'amategeko, igomba guteranira mu ngoro y'Inteko Ishinga Amategeko, inama yatumijwe, hari ibiri ku murongo w'ibyigwa, hari nibura bitatu bya gatanu (3/5) by'Abanyamuryango.
- (4) Iyo umubare wa ngombwa uteganywa mu gika cya 3 cy'iyi ngingo utabonetse, inama y'Inteko Rusange itumizwa bwa kabiri mu gihe kitarenze iminsi itanu (5) iyo ari inama isanzwe, no mu gihe kitarenze iminsi itatu (3) iyo ari inama idasanzwe y'Inteko Rusange. icyo gihe inama y'Inteko Rusange iterana hatitawe ku mubare uteganywa mu gika cya gatatu.
- (5) Inteko Rusange ifata ibyemezo ku bwumvikane busesuye bw'abitabiriye inama, iyo bidashobotse hakorwa itora, ibyemezo bigafatwa ku bwiganze burunduye bw'amajwi y'abagize Inteko Rusange bitabiriye inama.

(6) Inama y'Inteko Rusange ikorerwa inyandikomvugo yemezwa n'Inteko Rusange mu nama yayo ikurikira. icyo gihe umunyamuryango wese ushaka kugira icyo ayikosoraho ahabwa ijambo. Izo nyandiko zishyirwaho umukono n'umwanditsi wazo na Perezida wa RPRPD.

### **Ingingo ya 15: Itumizwa ry'undi muntu mu nama y'Inteko Rusange**

Inteko Rusange ishobora gutumira mu nama yayo umuntu wese ibona wayifasha kugera ku ntego za RPRPD . Uwatumiwe muri ubwo buryo ntigira uruhare mu ifatwa ry'ibyemezo.

### **Ingingo ya 16: Gusaba ijambo mu nama y'Inteko Rusange**

Umunyamuryango usabye ijambo mu nama y'Inteko Rusange araribabwa. Umunyamuryango wifuza gufata ijambo mu Nteko Rusange abikora azamura ikiganza cyangwa akoresheje ubundi buryo.

### **Icyiciro cya 2: Komite Nshingwabikorwa ya RPRPD**

#### **Ingingo ya 17: Abagize Komite Nshingwabikorwa**

1. Komite Nshingwabikorwa ya RPRPD igizwe n'abanyamuryango batanu, batorwa n'abagize Inteko Rusange.
2. Komite Nshingwabikorwa ya RPRPD igizwe na:
  - (a) Perezida, ari nawe Perezida wa RPRPD;
  - (b) Visi Perezida
  - (c) Abajyanama batatu .

#### **Ingingo ya 18: Itora ry'abagize Komite Nshingwabikorwa ya RPRPD**

- (1) Umunyamuryango wifuza gutorerwa kuba umwe mu bagize Komite Nshingwabikorwa atanga kandidatire ye mu nama y'Inteko Rusange.
- (2) Umunyamuryango ashobora kwiyamamaza cyangwa kwamamazwa n'undi munyamuryango. Umukandida watanze n'undi munyamuryango abanza guhabwa umwanya wo kwemera cyangwa kutemera ubwo busabe.
- (3) Uretse Abajyanama batorerwa rimwe, buri mwanya w'ugize komite nshingwabikorwa ya RPRPD utorerwa ukwawo.
- (4) Amatora yose akorwa ku bwiganze burunduye bw'amajwi y'abanyamuryango bitabiriye inama yabereyemo amatora. Iyo habayeho kungana kw'amajwi, hongera kuba irindi tora. Iyo nyuma y'iryo tora, abakandida bakomeje kunganya, amatora yimurirwa ku yindi tariki.

### **Ingingo ya 19: Uburyo bukoreshwa mu gutora Abagize Komite Nshingwabikorwa**

- (1) Uburyo bukoreshwa mu gutora abagize Komite Nshingwabikorwa bugenwa n'Inteko Rusange.
- (2) Amatora y'abagize Komite Nshingwabikorwa agenzurwa na Biro y'Umutwe w'Inteko Ishinga Amategeko ureberere RPRPD n'Abaseseri babiri (2) batorwa mu bagize RPRPD batiyamaje.

### **Ingingo ya 20: Manda y'abagize Komite Nshingwabikorwa**

Abagize Komite Nshingwabikorwa ya RPRPD batorerwa igihe cy'imyaka ibiri n'igice (2,5) ishobora kongerwa.

### **Ingingo ya 21: Inshingano za Komite Nshingwabikorwa**

- (1) Komite Nshingwabikorwa ya RPRPD ifite inshingano zikurikira:
  - (a) Gukurikirana ishyirwa mu bikorwa ry'intego za RPRPD;
  - (b) Gusaba ko hashyirwaho Komisiyo tekini no kugena abayigize bemezwa n'Inteko Rusange;
  - (c) Gukurikirana no guhuza ibikorwa bya RPRPD;
  - (d) Gutegura gahunda y'ibygwa n'inama z'Inteko Rusange;
  - (e) Gukurikirana ishyirwa mu bikorwa ry'ibyemezo by'Inteko Rusange;
  - (f) Gufata ibyemezo byihutirwa biri mu bubasha bw'Inteko Rusange, mu gihe idashobora guterana;
  - (g) Gutegura iteganyabikorwa rya RPRPD no gukurikirana uko rishyirwa mu bikorwa;
  - (h) Gutegura imbanzirizamushinga y'amategeko shingiro ya RPRPD;
  - (i) Gukorana n'izindi nzego bihuje inshingano haba mu gihugu cyangwa mu mahanga;
  - (j) Gukora indi nshingano yahabwa n'Inteko Rusange.
- (2) Ibyemezo bivugwa mu gika cya (1)(f) bigezwa ku Nteko Rusange mu nama yayo ikurikira ikabifataho umwanzuro.

### **Ingingo ya 22: Inshingano za Perezida wa RPRPD**

Perezida wa RPRPD ashinzwe ibi bikurikira:

- (a) Guhagararira RPRPD no kuba umuvugizi wayo;

- (b) Gutumira no kuyobora inama y'Inteko Rusange;
- (c) Guhuza ibikorwa bya Komite Nshingwabikorwa, gutumira no kuyobora inama zayo;
- (d) Kugenzura ko ibyemezo by'Inteko Rusange n'ibya Komite Nshingwabikorwa bishyirwa mu bikorwa;
- (e) Kugenzura ko intego za RPRPD zishyirwa mu bikorwa ;
- (f) Gutegura no gukurikirana ibikorwa bya RPRPD bigamije ubukanguramba;
- (g) Kumenyakanisha ibikorwa ba RPRPD;
- (h) Gukora indi mirimo yose yahabwa n'Inteko Rusange cyangwa Komite Nshingwabikorwa.

### **Ingingo ya 23: Inshingano za Visi Perezida**

Visi Perezida afite inshingano zikurikira:

- (a) Gusimbura Perezida wa RPRPD mu gihe adahari;
- (b) Gukurikirana ibikorwa bya Komisiyo tekiniki;
- (c) Gutegura no guhuza ibikorwa by'ubushakashatsi;
- (d) Gutegura gahunda zijyanye no kongerera ubushobozi abagize RPRPD;
- (e) Gukurikirana ibyerekeye itegurwa ry'inyandiko na raporo z'inama z'Inteko Rusange n'iza Komite Nshingwabikorwa;
- (f) Gukurikirana itegurwa ry'iteganyabikorwa rya RPRPD;
- (g) Gukora indi nshingano yahabwa n'Inteko Rusange cyangwa Komite Nshingwabikorwa.

### **Ingingo ya 24: Iterana ry'inama za Komite Nshingwabikorwa**

Komite Nshingwabikorwa iterana rimwe (1) mu kwezi n'igihe cyose bibaye ngombwa. Komite Nshingwabikorwa ifite ububasha bwose ku birebana no gushyira mu bikorwa intego za RPRPD n'ibyemezo by'Inama Rusange.

### **Ingingo ya 25: Abakozi ba RPRPD**

RPRPD igira abakozi bayunganira, bashyirwaho hakurikijwe amategeko abigenga.

## **Ingingo ya 26: Ibigererwa umunyamuryango uri mu bikorwa bya RPRPD**

Ibikorwa abanyamuryango bakorera RPRPD ntibihemberwa. icyakora, mu gihe abanyamuryango ba RPRPD bari mu mirimo yayo cyangwa mu ngendo bagenerwa ibyangombwa bibafasha hakurikijwe amategeko abigenga.

## **UMUTWE W A III: IMIKORERE YA RPRPD**

### **Ingingo ya 27: Uburyo bw'imikorere**

Mu mikorere yayo, RPRPD irangwa n'ibi bikurikira:

- (a) kuba isoko y'ibitekerezo bishya byifashishwa n'Inteko Ishinga Amategeko mu kumenya ibyuhoro biri mu mategeko, gutuma abanyamuryango bayigize babishingiraho mu gutegura imishinga y'amategeko, kugaragaza ibyuhoro biri mu iyubahirizwa ry'amategeko cyangwa mu gutuma inzego z'Inteko Ishinga Amategeko zibifitiye ububasha zishingira kuri raporo ya RPRPD mu kurushaho kunoza inshingano yo kugenzura ibikorwa bya Guverinoma;
- (b) kuba umusemburo w'impinduramatwara ugaragazwa n'uko abanyamuryango barangwa n'imyitwarire ntangarugero mu gushyira mu bikorwa intego za RPRPD;
- (c) gukora ubukangurambaga bugamije impinduka ziri mu cyerekezo cya RPRPD mu bagize Inteko Ishinga Amategeko, mu bafatanyabikorwa b'ihuriro no mu baturage.

### **Ingingo ya 28: Uruhare rwa RPRPD mu ishyirwa mu bikorwa ry'inshingano z'Inteko Ishinga Amategeko**

- (1) Gahunda y'ibikorwa y'umwaka RPRPD ishingira ku igenamigambi ry'igihe kirekire rya buri Mutwe w'Inteko Ishinga Amategeko.
- (2) RPRPD yunganira Inteko Ishinga Amategeko mu gushyira mu bikorwa inshingano yayo yo kujya impaka ku mategeko no kuyatora binyuze muri ibi bikurikira:
  - (a) Gutanga ibitekerezo bishobora gushingirwaho mu gutangiza umushinga w'itegeko ufite aho uhuriye n'intego za RPRPD;
  - (b) Gutanga ibitekerezo mu gihe hasuzumwa umushinga y'amategeko ufite aho uhuriye n'intego za RPRPD;
  - (c) Kumenyekanisha itegeko ryatangajwe ryerekeye intego za RPRPD;
  - (d) Gusesengura ishyirwa mu bikorwa ry'itegeko rifite aho rihuriye n'intego za RPRPD.

- (3) Mu gushyira mu bikorwa inshingano zayo, RPRPD itanga amakuru afasha za Komisiyo zihoraho mu bikorwa byo kugenzura ibikorwa bya Guverinoma, binyuze muri ibi bikurikira:
- (a) gukora isesengura ryimbitse rya politiki ya Leta ifite aho ihurira n’itego za RPRPD;
  - (b) gukora isesengura rya raporo z’inzeho zifite aho zihuriye n’itego za RPRPD;
- (4) RPRPD ifasha mu ishyirwa mu bikorwa ry’ibyo u Rwanda rwiyejeje ku rwego mpuzamahanga ikoresheje uburyo bukurikira:
- (a) gusesengura ibibazo bigaragara mu ishyirwa mu bikorwa ry’ibyo u Rwanda rwiyejeje;
  - (b) gukora ubukangurambaga aho bukenewe, hagamijwe gufasha kuzamura uruhare rw’inzeho, abatwaga n’abafatanyabikorwa mu ishyirwa mu bikorwa ry’ibyo u Rwanda rwiyejeje.
- (5) Ku byerekeye iyubahirizwa ry’amahame remezo, RPRPD iharanira iyubahirizwa ry’amahame remezo afite aho ahurira n’itego zayo mu buryo bukurikira:
- (a) gutanga ibitekerezo bifasha Sena gukurikirana iyubahirizwa ry’amahame remezo;
  - (a) gukora ubukangurambaga ku iyubahirizwa ry’ihame remezo rijyanye n’itego zayo.

## **UMUTWE WA V: IMIKORANIRE YA RPRPD N’IZINDI NZEGO**

### **Ingingo ya 29: Umutwe ureberera RPRPD**

- (1) Ku bwumvikane bwa Biro z’Imitwe yombi y’Inteko Ishinga Amategeko, RPRPD igira Umutwe w’Inteko Ishinga Amategeko uyireberera.
- (2) Umutwe w’Inteko Ishinga Amategeko ureberera RPRPD, buri mwaka uteganya mu ngengo y’imari yawo amafaranga ugenera ibikorwa bya RPRPD.
- (3) Umunyamabanga Mukuru w’Umutwe w’Inteko Ishinga Amategeko ureberera RPRPD akora buri mwaka n’igihe cyose bibaye ngombwa, raporo y’imikoreshereze y’umutungo wa RPRPD akayishyikiriza Perezida w’Umutwe ureberera RPRPD, akagera kopi Perezida w’undi mutwe w’Inteko Ishinga Amategeko.

### **Ingingo ya 30: Gukurikirana imikorere ya RPRPD**

- (1) Biro z’Imitwe yombi y’Inteko Ishinga Amategeko zikurikirana imikorere ya RPRPD zibinyujije kuri ba Visi Perezida mu Mitwe yombi y’Inteko Ishinga Amategeko bashinzwe amategeko no kugenzura ibikorwa bya Guverinoma.
- (2) Ba Visi Perezida b’Imitwe yombi y’Inteko Ishinga Amategeko bakurikirana imikorere y’amahuriro na Perezida wa RPRPD barebera hamwe iteganyabikorwa ryayo.

### **Ingingo ya 31: Raporo y’ibikorwa bya RPRPD**

- (1) Buri gihembwe n’igihe cyose bibaye ngombwa, RPRPD ishyikiriza Perezida wa buri Mutwe w’Inteko Ishinga Amategeko gahunda na raporo y’ibikorwa byayo.
- (2) Iyo Perezida wa buri Mutwe w’Inteko Ishinga Amategeko yakiriye raporo y’ibikorwa ayishyikiriza abagize uwo Mutwe.
- (3) Mu gihe hari ibyo raporo y’ibikorwa yagaragaje bishobora gufatwaho icyemezo, Biro z’Imitwe yombi y’Inteko Ishinga Amategeko zumvikana ku gikwiye gukorwa.

### **Ingingo ya 32: Ishyirwaho rya Komisiyo tekiniki**

- (1) Bisabwe na Komite Nshingwabikorwa, Inteko Rusange ya RPRPD ishobora gushyiraho Komisiyo tekiniki ishinze gusuzuma ikibazo cyihariye gifite aho gihurira n’itego ya RPRPD.
- (2) Abakandida muri Komisiyo tekiniki batangwa na Komite Nshingwabikorwa bakemerezwa hamwe n’Inteko Rusange ku bwiganze burunduye bw’amajwi y’Abitabiriye inama.
- (3) Komite Nshingwabikorwa ishyikiriza Inteko Rusange abagize Biro ya Komisiyo tekiniki igizwe na Perezida na Visi Perezida, bemezwa umwe ukwe n’undi ukwe n’Inteko Rusange ku bwiganze burunduye bw’amajwi y’Abitabiriye inama.

### **Ingingo ya 33: Raporo ya Komisiyo tekiniki ya RPRPD**

Nyuma y’igikorwa cya Komisiyo tekiniki, Perezida wa RPRPD ashyikiriza raporo ba Perezida b’Imitwe yombi y’Inteko Ishinga Amategeko. icyakora, iyo raporo igagaraza ikibazo gikwiye gukomeza gukurikiranwa n’izindi nzego z’Inteko Ishinga Amategeko, raporo ishyirikizwa Perezida w’Umutwe w’Inteko Ishinga Amategeko ufite inshingano zifite aho zihuriye n’igikorwa cya RPRPD, Biro yawo igafata umwanzuro ku gikwiye gukorwa.

### **Ingingo ya 34: Imikoranire ya RPRPD n'abafatanyabikorwa**

- (1) Gahunda z'ibikorwa bya RPRPD n'imikoranire yayo n'izindi nzego bikorwa hakurikije ibiteganywa n'Itegeko Ngenga rigena imikorere ya Sena n'Itegeko Ngenga rigena imikorere y'Umutwe w'Abadepite.
- (2) Mu bikorwa bya RPRPD ishobora kwiyambaza abandi bagize Inteko Ishinga Amategeko batari abanyamuryango bayo.
- (3) RPRPD ibinyujije kuri Perezida w'Umutwe w'Inteko Ishinga Amategeko uyireberera, ishobora gutumira mu nama yayo undi muntu ibona ko ashobora kuyunganira mu gikorwa irimo. Mu bikorwa byayo RPRPD ishobora kandi kwifashisha impuguke.
- (4) Ubutumire bw'Umunyamuryango wa RPRPD buturutse mu nzego za Leta n'abafatanyabikorwa bunyuzwa kuri Perezida w'Umutwe w'Inteko Ishinga Amategeko uyireberera.

### **UMUTWE W A IV: UMUTUNGO WA RPRPD**

#### **Ingingo ya 35: Inkomoko y'umutungo wa RPRPD**

Umutungo wa RPRPD ukomoka aha hakurikira:

- (a) Ingingo y'imari igenerwa n'Umutwe w'Inteko Ishinga amategeko uyireberera;
- (b) Ingingo y'imari itangwa n'umufatanyabikorwa.

#### **Ingingo ya 36: Imicungire y'umutungo wa RPRPD**

Umutungo wa RPRPD ucungwa hakurikijwe amategeko agenga imicungire y'imari n'umutungo bya Leta.

### **UMUTWE WA VI: ISESWA RYA RPRPD**

#### **Ingingo ya 37: Iseswa rya RPRPD**

RPRPD iseswa hakurikijwe ibiteganywa n'Itegeko Ngenga rigena imikorere ya buri Mutwe w'Inteko Ishinga Amategeko.

## **UMUTWE WA VII : INGINGO ZISOZA**

### **Ingingo ya 38: Ivanwaho ry'ingingo zinyuranyije n'aya mategeko-shingiro**

- (1) Ingingo zinyuranyije n'aya mategeko-shingiro zivanyweho.
- (2) Iyo hari ikibazo kireba RPRPD kinateganyijwe n'aya mategeko nshingiro cyangwa n'Itegeko Ngenga rigena imikorere ya buri Mutwe w'Inteko Ishinga Amategeko, Biro z'Imitwe yombi y'Inteko Ishinga Amategeko zumvikana ku buryo cyakemuka.

### **Ingingo ya 39: Igihe aya mategeko shingiro atangirira gukurikizwa**

Aya mategeko-shingiro atangira gukurikizwa ku munsu yemerejweho n'Inama Rusange ya RPRPD.

**Kigali, ku wa 05/12/2024**